

欽定天文正義

欽定天文正義卷二十

太微垣占

太微垣占

史記天官書南宮朱鳥權衡衡太微三光之廷匡衡十二星藩臣西將東相南四星執法中端門門左右掖門

晉書天文志太微天子庭也五帝之座也十二諸侯府也其外藩九卿也一曰太微為衡衡主平也又為天庭理法平辭監升授德列宿受符諸神考節舒情稽疑也南藩中二星間曰端門東曰左執法廷尉之象也西曰右執法御史大夫之象也執法所以舉刺凶姦者也左執法之東左掖門也右執法之西右掖門也東藩四星南第一星曰上相其北東太陽門也第二星曰次相其北中華東門也第三星曰次將其北

東太陰門也。第四星曰上將。所謂四輔也。西藩四星。南第一星曰上將。其北西太陽門也。第二星曰次將。其北中華西門也。第三星曰次相。其北西太陰門也。第四星曰上相。亦曰四輔也。東西藩有芒及搖動者。諸侯謀執法移刑罰尤急。

觀象玩占。太微宮垣十星。在翼軫之北。天子之廷。上帝之所治。一曰天庭。一曰保舍。巫咸曰。太微土官也。黃帝占曰。太微東西藩各四星。南北列。南藩兩星。東西列。十星齊明。則將相同心。天下治安。差戾則輔臣乖違。不明則臣失職。動搖則諸侯謀。芒角則大臣專恣。執法怒則威刑急。移徙則刑罰不中。

月五星犯太微垣

史記天官書月五星順入軌道司其出所守天子所誅也其
逆入若不軌道以所犯命之中坐成形皆羣下從謀也金火
尤甚

漢書天文志太微者天廷也太白行其中宮門常閉大將被
甲兵邪臣伏誅 歲星入太微逆行於右執法占曰大臣有
憂執法者誅若有罪

後漢書天文志太白贏而北入太微是大兵將入天子廷也
出太微為中宮有兵 熒惑出太微為亂臣入太微亂臣在
廷中 鎮星犯左執法有誅臣 長星入太微為大水一日
後宮有憂 歲星入太微犯左執法將相有誅者

晉書天文志五星入太微從右入三十日以上人主有大憂
一曰有赦又日月五星犯左右執法大臣有憂一曰執法者
誅金火尤甚 熒惑守太微六十日占曰諸侯三公謀其上
必有斬臣熒惑逆行入太微占曰為兵喪熒惑犯上將星占
曰上將憂犯右執法占曰執政者憂逆行犯太微西上相占
曰天子戰於野上相死 辰星入太微占曰為內亂一曰羣
臣相殺 太白入太微犯上將占曰天子自將上將誅太白
入太微右掖門從端門出占曰貴奪勢一曰有兵又日出端
門臣不臣

隋書天文志歲星犯太微上將占曰天下大將憂大臣死逆

行掩太微上將占曰天下大驚四輔有誅者 太白入太微
占曰為天下驚又曰近臣起兵大臣相殺國有憂

宋史天文志月犯太微垣輔臣惡之又君弱臣強四方兵不
制犯執法海中占云將相有免者期一年月入東西門左右
掖門而南出端門有叛臣君憂入西門出東門君憂大臣假
主威月中犯乘守四輔為臣失禮輔臣有誅 歲星入有敵
犯之執法臣有憂入東門天下有急兵守之將相執法憲臣
死入端門守天庭大禍至入南門出東門旱入南門逆出西
門國有喪逆行入東門出西門國破亡 填星熒惑犯之逆
行入為兵喪犯上將上將憂守端門國亡或三公謀上有戮

臣犯西上將天子戰於野上相死入太微色白無芒天下饑
退行不正有大獄犯太微門左右將死入天庭在屏星南出
左掖門左將死右掖門右將死直出端門無咎入太微凌犯
留止為兵入二十日廷尉當之留天庭十日有赦犯太微東
南徼歲饑執法大臣憂犯上相大臣死填星犯入太微有德
令女主執政若逆行執法四輔守之有憂守太微國破守西
蕃王者憂 太白犯入太微為兵大臣相殺留守有兵喪
辰星犯太微有內亂入天庭後宮憂大水守左右執法入兵
起有赦入西門後宮災大水入西門出東門為兵喪水災
觀象玩占月入太微荊州占曰有所犯則隨其所中之官命

之鄰萌曰有奸人伺主之廷亦曰有喪月入太微中四夷有詐不可信月入太微庭有所干犯皆為臣下謀逆宜急求賢人用之月犯太微四輔輔臣誅犯執法執法誅從其所中命之 歲星以甲子日入太微天度中天帝所使也黃帝占曰木入太微色白潤澤期百八十日有赦齊伯占曰木入太微由軌道而出諸侯有受封者木東行入太微庭歲不登人民饑木從太微南門入而逆行西門出國有大水木逆行入太微玉歷曰強臣凌主諸侯起兵 熒惑入太微天下不安甘氏曰臣謀逆一曰有立王一曰宮中有亂又曰賊入宮一曰火入天庭天下饑一曰後三年有喪色白潤澤期百八十日

有赦火犯太微門右星大將死犯門左星次將死大臣憂執
法者誅火以丙子順入太微廷中天帝所使也順去不留不
為殃火守太微垣門外之左廷尉有事守門外之右丞相御
史有事守端門中二十日臣作亂火逆行天廷中不留天下
有獄填星犯太微強臣執權土入太微中大人憂入太微
天廷中天子驚有兵色白潤澤則有赦土入太微有所中犯
乘守皆為天子所誅土入太微太陰西門出太陰東門天下
亂有喪且有大水土守太微石氏曰有亡國土逆行太微四
輔左右執法而環繞守之所當者死亡土逆行天廷貴臣有
逆謀太白以庚子日順入太微天廷中天帝所使也不以

庚子日入非天帝所使也太白入太微行天廷中司馬彪曰
有大兵入又曰丞相御史廷尉有憂荊州占曰近臣起兵又
曰天子之廷太微西藩第一星至東藩第一星東下是也五
星皆不當行其中石氏曰太白入微留守之及有凌犯皆為
兵喪太白入太微出左掖門大將出東南伐出右掖門大將
出西北伐皆不出其年太白入左右掖門出太陽東門強臣
誅太白入西華門出東華門大臣作亂謀其主若諸侯不從
王命太白順行當太微端門為受刑當左右執法為受辜留
太微門三日以下為受賜三日以上為兵為亂為賊為饑
辰星以壬子日順入太微天帝所使也不以壬子日非帝所

使也則為殃咎辰星入太微荆州占天下驚有兵一曰天下有聖女子出陳卓曰羣臣相殺一曰大水傷人物水入左右掖門而出東門天下有憂辰星犯四輔輔臣誅若死喪以所中命之

天文會通白虹貫月犯太微庭則天子無出宮月入中華西門出左掖門有大水 木星入太微宮天下有喜木星順入西藩留而不出楚國憂木星犯守太微色黃潤天下安靜期五十日有德音木星退入犯將相有兵國亂主憂 火犯太微留二十日以上及芒角則天下興大獄久舍不出忠良亡任臣祿 土星中犯守左右執法執法者有罪 金星逆行

入太微垣留十日以上則王者憂兵起禁衛若變色逆犯太
微上次相則大臣受禍犯上次將則大將受刑犯左右執法
則廷尉惡之犯守端門久而不去則臣有逆謀 水星守太
微西藩臣有憂犯東藩大將受戮水星逆犯太微垣光芒變
色則王者憂歲饑糶貴色白則天子自將兵色黃赤則大臣
爭權逆犯左右執法則廷尉受辱亦曰執法者受殃犯將相
則大臣亡天子誅有罪

按太微垣垣墻十星左執法一星在黃道北一度半右執
法一星在黃道北半度強西上將一星在黃道北一度半
強月五星皆及犯之東上相一星在黃道北三度弱月與

土火金水四星皆及犯之惟木星不及犯西次將一星在黃道北六度月與金星及犯之土木火水四星皆不及犯西次相一星在黃道北十度弱東次相一星在黃道北八度半惟金星及犯之月與土木火水四星皆不及犯其餘三星在黃道北十四度外月五星皆不及犯

彗孛客星見太微垣

史記天官書客星出天廷有奇令

晉書天文志客星出太微國有兵喪又曰入太微兵入天子庭

宋史天文志客星犯入太微色黃白天子喜出入端門國有

憂出天庭有苛令兵起入太微三十日有赦犯四輔輔臣凶

彗星犯太微天下易出太微宮中憂火災犯執法執法者

黜犯天庭王者有立 孛於翼近太微上將為兵喪

觀象玩占彗孛入太微人不安女主憂彗孛干犯太微天下

亂有兵喪大人惡之彗孛干歷太微所歷者亡彗如粉絮入

太微守帝坐國有喪天下亂兵起有所犯各以其官命之彗

孛出太微天下亂宮中火災兵起大人死國易政 客星出

太微天廷中黃帝占曰人主憂臣謀反一曰執政臣有戮者

海中占曰大水入城郭若有所犯守各以其所中者命之客

星入太微端門而出西門天下大水大饑入端門而出東門

天下大旱五穀不成入端門而復出端門其國有大患天下
亂客星入太陰門後宮有賊一曰兵起天下動入太陰西門
出太陰東門大水天下亂客星入太微中乙巳占曰兵大起
有賊客入國守之十日不出其災成在陽為男在陰為女客
星入太微色白潤澤有赦色赤黃火大起有客賊入國客星
入太微中守天廷三十日宮中有賊大人憂之

天文會通孛星出太微垣東藩則有陰謀逆命者抵太微垣
西藩則百官憂亦曰蕃衛有異謀孛星干犯西蕃上相掩星
不見則其野有死將干犯天庭則天子有憂色赤黃則天子
出奇令青黑則天下大亂孛星直抵太微垣三公九卿星則

人臣爭權又曰大臣擅天子柄星孛大微垣環繞東西蕃抵觸不已則禁園有變亦曰有內兵起 客星入太微垣留五十日以上則天廷有奸人客星大如椀有芒角四出乍東乍西乍南乍北入太微垣留五十日以上則天下大亂國大憂 客星出角抵端門諸侯不受制於天子 一曰強臣挾天子以令諸侯

流星出入太微

宋史天文志流星出太微大臣有外事出南門甚衆貴人有死者縱橫太微宮主弱臣強由端門入翼光照地有聲有立

王

觀象玩占。流星出太微端門者，天子使也。以所之野命其所往之國。星來為使復命，以五色言其事。及其吉凶。石氏曰：流星出太微，兵起。大將出，奔星出太微，中有立王。若徒王，流星入太微，有內亂。兵起，近西相也。近東將也。一曰：流星入太微，廷中外邦以急有使來，不出其年。流星犯抵太微四輔左右，執法各以其所中者言其死。以其日命國，不出三年。流星大而赤，狀如浮舟，數出入天廷，有賊臣欲謀主人，君戒出游。天文會通：流星觸上相，有奸謀。大臣觸上將，有刺殺將軍。一曰：奸寇入營，流星出入端門，直抵中座，反從端門出，則異域有奸使。亦曰：匈奴入寇。

雲氣出入太微

宋史天文志青白黑雲氣入左右掖為喪出無咎赤氣入東掖門內起兵黃白雲氣入太微垣人主喜年壽長入左右掖門天子有德令黑及蒼白氣入天子憂出則無咎黑氣如蛇入垣門有喪

觀象玩占太微垣中有雲氣如鳥諸侯有謀青氣起五帝坐徑出南門天下不安出左右掖門兵起將憂赤雲氣出太微兵起一曰有立王赤氣如杯椀正圓出太微中天子用璧賜諸侯赤氣直指太微帝坐左右有內亂兵起天子驚赤氣出東西掖門兵起將受令入東西掖門內亂兵起赤氣如彗帚

出太微天子宮中財竄出黃白氣入東西掖門天子有喜出
東西掖門天子出德令黃白氣出太微有立王黃白氣如蛟
蛇及龍形在太微宮閣上有白衣之會若環太微天廷則為
逆亂死喪赤黑青氣同此皆亂臣讒賊之氣也黃白氣狀如
杯棬正圓入太微有貢璧玉者黃白氣如獸出太微天子以
畜賜諸侯王入之則為有貢奇獸者黃白雲氣出太微宮上
如旗有光人主壽昌赤黃氣潤澤入太微中天子有喜事白
氣入太微宮中兵自外入有喪蒼白氣入太微東西掖門天
子憂喪事出則禍除蒼白氣如人及走獸入太微坐旁有反
者黑氣入東西門若左右掖門大人憂虹入太微有謀逆者

視其所起占之

五帝座

史記天官書其內五星五帝坐

按其承上文指五諸侯而言

正義黃帝坐

一星在太微宮中舍樞紐之神四星夾黃帝坐蒼帝東方靈威仰之神赤帝南方赤熒怒之神白帝西方白招矩之神黑帝北方叶光紀之神五帝並設神靈集謀者也占五座明而光則天子得天地之心

宋史天文志內五帝坐五星內一星在太微中黃帝坐舍樞紐之神也天子動得天度止得地意從容中道則明以光不明則人主當求賢以輔法不則奪勢四帝星夾黃帝坐黃帝

坐明天子壽威令行小則反是勢在臣下若亡大人當之
觀象玩占五帝座五星在太微宮中天子之位帝坐明大光
澤則天子有道天下歸心

金星犯五帝座

宋史天文志太白入有強臣兵在宮中

觀象玩占金入帝坐天子憂賊

天文會通金星抵帝座有大土功

按五帝座五星第一星在黃道北十二度強第二星在黃
道北十四度第三星在黃道北十度半第四星在黃道北
十四度弱月五星皆不及犯第五星在黃道北九度半惟

金星及犯之月與土木火水四星皆不及犯

彗孛客星見五帝座

宋史天文志客星色黃白抵帝坐臣獻美女 彗星入宮亂
抵帝坐或如粉絮兵喪並起

觀象玩占彗孛出帝坐兵起有亡國死君有立王天下亂

彗刺帝坐宮中亂兵起有喪 客星入太微犯黃帝坐天子
憂臣謀主至坐而還謀不成反受其殃抵帝旁臣謀反赤星
銳如鈞抵帝坐天子兵驚一日火驚

天文會通彗星如帚抵帝座兵起內亂彗孛抵犯五帝座尾
掃左右執法則強臣擅兵柄 客星入五帝犯中座則人主

有憂客星色黃潤出五帝座天子出德令安天下客星色赤
抵中座則卓騎滿野客星犯五帝座及乘守中座大人當之
一曰大喪又曰大臣有叛者客星干犯乘守四帝座則天子
失股肱乘守中座及有芒角相犯射則天子憂兵禁衛兵起
流星出入五帝座

宋史天文志流星犯之大臣憂抵四帝坐輔臣憂人多死
觀象玩占流星犯四帝坐執政者憂

天文會通流星自端門直入抵五帝座色黃則天子謀外國
使色青赤黑則外國奸使有變謀色白則兵四起一曰禁衛
兵變

雲氣出入五帝座

宋史天文志蒼白氣抵帝座有喪青赤近臣欲謀其主黃白
天子有子孫喜

觀象玩占蒼白氣抵帝坐旁有反臣赤氣如劍指帝坐天子
有兵驚赤氣出太微中直指帝坐內亂兵起氣自外入指帝
坐防外兵入黑氣抵五帝坐左右諸侯有死者赤黃氣出五
帝坐天子有賜於諸侯黃白氣正圓如杯椀抵帝坐左右諸
臣有喜黃白氣潤澤狀如刀劍抵坐旁天子有男喜

天文會通蒼白氣如走獸入抵帝坐天子有憂赤黃氣入之
天子用錢帛賜諸侯赤氣出帝座兵起有自立者

太子

宋史天文志太子一星在帝坐北帝儲也儲有德則星明潤
按太子一星在黃道北十七度月五星皆不及犯

彗孛客星見太子

觀象玩占客星彗孛犯太子太子不死則廢

天文會通彗星自左掖門入抵太子星東宮有火災 客星

蒼白色犯太子星則東宮有憂一日太子親戎服

流星出入太子

天文會通流星從太子旁出端門則儲君出宮一日太子親

政事

雲氣出入太子

宋史天文志雲氣入黃為喜黑為憂

五諸侯

史記天官書門內六星諸侯正義內五諸侯五星列在帝庭其星並欲光明潤澤若枯燥則各於其處受其災變大至誅戮小至流亡若動搖則擅命以干主者審其分以占之則無惑也又云五諸侯五星在東井東北近北河主刺舉戒不虞又曰理陰陽察得失一曰帝師二曰帝友三曰三公四曰博士五曰太史此五者為天子定疑議也占明大潤澤大小齊等則國之福不然則上下相猜忠臣不用

宋史天文志內五諸侯五星在九卿西內侍天子之不國按
志作不也乾象新書在卽位南辟雍禮得剛星明亡則諸侯
之國點

觀象玩占內五諸侯五星在太微宮中天子畿內之諸侯也
主刺也

按五諸侯史記天官書作六星各史志占書與今測皆作
五星其最南一星亦在黃道北十五度強月五星皆不及
犯

彗孛客星見五諸侯

觀象玩占客星彗孛犯五諸侯或守之皆為諸侯有誅死者

不則有貶黜者

天文會通彗掃五諸侯諸侯以兵死
星孛五諸侯近帝座
天子有憂諸侯被黜一曰旬服不庭

客星色蒼白犯五諸侯諸侯專恣
客星色青黃守五諸侯諸侯握兵

流星出入五諸侯

觀象玩占流星犯之宰相被辱

天文會通流星干犯諸侯星則諸侯不臣謀起兵戈亡地失
職

雲氣出入五諸侯

天文會通蒼白氣入五諸侯則諸侯以兵竊天子柄黃氣下
覆五諸侯則天子以玉帛賜諸侯黑雲氣掩諸侯則諸侯以
兵叛

從官

宋史天文志從官一星在太子北侍臣也以不見為安一日
不見則帝不安如常則吉

天文會通從官一星侍衛之臣也星微明而黃潤則吉明大
臣擅有芒角則大臣擅權侍臣被黜則從官星亡

按從官一星在黃道北十七度半月五星皆不及犯

彗孛客星見從官

天文會通彗孛干犯從官星權臣有誅一曰輔臣當之彗
掃從官人臣失職星孛從官旁天子失輔臣客星抵觸
從官八坐惡之亦曰從官黜

流星出入從官

天文會通流星出從官星旁經端門而出則使臣受命出疆
雲氣出入從官

天文會通蒼白雲氣犯從官侍臣失職黃雲氣入從官天子
以束帛賜侍從臣黑雲氣掩從官天子失侍從赤黃氣犯從
官則從官專恣終以事敗

幸臣

宋史天文志幸臣一星在帝坐東北常侍太子以暗為吉新書在太子東

按幸臣一星在黃道北十七度月五星皆不及犯

彗孛客星見幸臣

天文會通彗孛客星犯守幸臣近侍有異心伏誅

流星出入幸臣

天文會通流星抵觸幸臣親愛之臣辱

雲氣出入幸臣

宋史天文志青赤氣入之近臣謀君不成

天文會通黑雲氣出太微掩幸臣寵臣有憂蒼白雲氣掩幸

臣權臣受戮黃雲氣覆幸臣上近臣受賜

內屏

宋史天文志內屏四星在端門內近右執法屏者所以擁蔽帝庭也

觀象玩占屏四星內屏在太微門中五帝坐南主執法刺舉其星明潤則君臣有禮不明則法律舛謬

月五星犯內屏

觀象玩占月犯乘內屏君臣失禮輔臣有誅黜者五星中犯乘守內屏君臣失禮下謀上一曰大臣有戮死者太白入太微至屏而留有兵在官中

天文會通。太白經天由端門近中座。乘守內屏則近臣被黜。
火星逆行乘守內屏則君臣失禮。執法者被逐。水星乘

守屏星權臣失位

按內屏四星。第一星在黃道北六度。第三星在黃道北六
度。月與金星及犯之。土木火水四星皆不及犯。第二星在
黃道北四度。半月與火金二星及犯之。土木水三星皆不
及犯。第四星在黃道北八度。半月與金星及犯之。月與土木
火水四星皆不及犯。

彗孛客星見內屏

觀象玩占。彗孛出內屏。守衛之臣有以罪誅者。一曰執法者

當之。客星犯守屏星輔臣有誅。若黜者。一曰君臣失禮。輔臣有諫而被貶黜者。赤星出屏星有僭位者。

天文會通彗星干犯內屏。近臣有憂。彗孛犯守內屏。執法者憂。兵起宮中。客星干犯內屏。色白。奸寇入廷。禁衛有兵起。

流星出入內屏

觀象玩占流星犯內屏尚書憂

天文會通流星干犯內屏近臣失職

雲氣出入內屏

天文會通黃氣入內屏侍臣受賜蒼白氣入禁兵起赤氣入

有冤獄黑氣入執法者逐

左右執法

宋史天文志左右執法各一星在端門兩旁左為廷尉之象右為御史大夫之象主舉刺凶姦君臣有禮則光明潤澤乾象新書在中台南明則法令平

月五星犯左右執法

宋史天文志月五星犯守則君臣失禮輔臣黜熒惑太白入為兵

觀象玩占月行左右執法大臣憂木犯執法大臣專命火犯左右執法不誅則死土逆行左右執法而環繞守之

所當者死亡。太白當左右執法為受辜。辰星犯左右執法若守之皆為兵起有敵。

天文會通彗孛犯左右執法將相有免黜者。木星守左右執法憲臣有死者犯左右執法將相執法臣有憂。火星犯左右執法則執法者憂誅。土星犯左右執法則執法者死。金星變色逆犯左右執法則廷尉惡之。水星犯左右執法廷尉御史災。

彗孛客星見左右執法

宋史天文志客星犯守則君臣失禮輔臣黜

天文會通彗孛犯左右執法執法者黜。客星犯左右執法

執法者有罪

流星出入左右執法

宋史天文志流星犯之尚書憂

天文會通流星抵左右執法廷尉將命達於四方平理冤獄

郎位

史記天官書後

按後承上文指五帝座而言

聚一十五星蔚然曰郎位

按漢

書作哀鳥郎位

宋史天文志郎位十五星在帝坐東北一曰依鳥郎府也周之元士漢之光祿中散諫議議郎郎中是其職主衛守也其星不具后妃災幸臣誅星明大臣為亂元士憂

觀象玩占。郎位十有五星。在太微帝坐東北。張衡曰。今之尚書郎也。其星大小均齊。光潤有常。則吉。明威角動。則臣有劫主者。星不具。則侍臣誅微暗黑小。則郎官失職。

按郎官位十五星。其最南一星。亦在黃道北二十度。月五星皆不及犯。

彗孛客星見郎位

宋史天文志。客星入之大臣為亂。元士憂。彗孛犯郎官失勢。彗星枉矢出其次。郎佐謀叛。

觀象玩占。彗孛出郎位。郎官有謀叛者。犯郎位。郎官憂。客星犯郎位。大臣失勢。入郎位。大臣為亂。石氏曰。多死者。赤星。

入兵起黑星入郎官多犯罪者蒼白星入郎官為亂出郎官位郎官出將一曰守衛臣有謀人主憂將相有誅者外夷反叛守郎位元士憂荆州占曰將有憂

天文會通彗孛干犯郎位郎官失職一曰近臣有異志天子失朝弼客星中郎位則大臣有逆謀一曰禁衛兵起

流星出入郎位

觀象玩占流星犯郎位郎官有貶黜者出郎位郎官出使色赤為將兵出

雲氣出入郎位

宋史天文志赤氣入兵起黃白吉黑凶

觀象玩占。蒼白氣入郎位。兵起。一日中郎有內亂者。出郎位。則禍除。赤氣入郎位。中兵起。出郎位。多用兵。遠出行。黃白氣。潤澤入郎位。中郎受賜。黑氣入郎位。中郎多以罪死。天文會通。黑氣掩郎位。近臣有死喪。

郎將

史記天官書。傍一大星。將位也。

按傍承上文指郎位而言

宋史天文志。郎將一星。在郎位北。主閱具。以為武備也。若今之左右中郎將。新書曰。在太微垣東北。明大臣叛。

觀象玩占。郎將一星。武衛之官也。星明大。則將專恣。明而角動。則將為亂。

天文會通。郎將一星，執金吾之職也。星明光潤，則武備修侍衛得人；暗則反是。芒角則武臣專恣。

按郎將一星在黃道北三十度，月五星皆不及犯。

彗孛客星見郎將

宋史天文志：客星犯守郎將，誅。

觀象玩占：彗孛出郎將，大將反；兵起犯之，將軍不誅則死。

客星入郎將，若守犯之，大臣為亂，君令不行。客星出郎將，色青黑，郎將不死則黜；色黃，有遷白受賜。

天文會通：彗星入郎將，則天子左右有陰謀不成，以事坐誅。

彗孛抵觸郎將，炸若火炬，及五十日不滅，天下亂。客星

明大色赤曰出四角守郎將大將以兵敗伏法色黑大將握
兵叛主色蒼白將士自相殘

流星出入郎將

宋史天文志流星犯將軍憂

雲氣出入郎將

宋史天文志黃白氣入則受賜

天文會通蒼白雲氣入郎將三軍不和一曰兵破將亡黃雲
氣入之大將受賜黑氣入之衛士叛赤氣入則大將有憂

常陳

宋史天文志常陳七星如畢狀在帝坐北天子宿衛虎賁之

士以設強禦也。星搖動，天子自出將，明則武，兵用微則弱。

按常陳七星，其最南一星亦在黃道北三十八度弱，月五星皆不及犯。

彗孛客星見常陳

宋史天文志：客星犯王者行誅。

觀象玩占：彗孛出常陳，天子殺守衛之臣；一曰防守者有死。

客星出常陳，守衛者有謀，兵起左右。天文會

天文會通：彗掃常陳，衛士散徙。星孛常陳旁，宿衛兵起。

客星乘守常陳，衛士通外奸，謀以兵變。

九卿

宋史天文志九卿三星在三公北主治萬事今九卿之象也
乾象新書在內五諸侯南占與天紀同

觀象玩占九卿三星在太微宮中九卿朝會之內坐也

天文會通九卿三星主弼帝也明則朝廷治四海安寧暗則
百官失職

按九卿三星其最南一星亦在黃道北十一度月五星皆
不及犯

彗孛客星見九卿

觀象玩占彗孛出九卿九卿有反者犯之九卿受誅

天文會通九彗孛干犯九卿公卿受辱一曰大臣下獄干犯

九卿近中座。天子憂公卿以兵變，一曰公卿以事坐法。客星抵觸九卿，公卿有爭訟。

流星出入九卿

天文會通：流星出九卿，天子遣公卿出使。

雲氣出入九卿

天文會通：蒼白氣入九卿，則朝廷以兵柄付公卿；黃氣入之，天子以玉帛賜公卿；黑氣入之，公卿坐法。

三公

宋史天文志：三公三星，在謁者東北，內坐朝會之所，居也。乾象新書：在九卿南，其占與紫微垣三公同。

觀象玩占三公三星在太微官中所以輔德謀事

按三公三星第一星在黃道北九度弱第三星在黃道北八度惟金星及犯之月與土木火水四星皆不及犯第二星在黃道北十度半月五星皆不及犯

彗孛客星見三公

觀象玩占客星彗孛犯乘三公有憂不則將相大臣有誅若死者

天文會通彗星出入三公將相下獄 星孛三公客星守三公三公當之有戮誅事

流星出入三公

觀象玩占。流星犯乘，三公有憂，不則將相大臣有誅，若死者。天文會通。流星從三公出端門，則三公出使。

雲氣出入三公

天文會通。黃氣入三公，三公受賞。赤黃氣入之，三公出鎮。黑雲氣出之，臣下有陰謀不成。

謂者

宋史天文志。謂者一星在左執法東北，主贊賓客，辨疑惑。乾象新書。在太微垣門內左執法北，明盛則四夷朝貢。

觀象玩占。謂者一星在太微宮中，星明則四夷來賓，不見則外國不服。

月五星犯謁者

天文會通火星逆行犯謁者外國不賓金星逆行犯謁者外國有好使入境

按謁者一星在黃道北五度月與火金二星及犯之木土水三星不及犯

彗孛客星見謁者

天文會通彗孛干犯謁者突厥侵境客星守謁者有好使入中國若色青赤有光芒乍東乍西則盜賊四起

雲氣出入謁者

天文會通黑氣入謁者外奸通內謀以害朝政白雲氣入之

外夷擾中國黃雲氣入之中外和好青赤雲氣入之外國奸
使入境

三台

史記天官書魁下六星兩兩相比者名曰三能三能色齊君
臣和不齊為乖戾索隱紫漢書東方朔願陳秦階六符孟康
曰秦階三台也台星凡六星六符六星之符驗也應劭引黃
帝秦階六符經曰秦階者天子之三階上階上星為男主下
星為女主中階上星為諸侯下星為卿大夫下階上星為士
下星為庶人三階平則陰陽和風雨時不平則稼穡不成
宋史天文志三台六星兩兩而居起文昌列抵太微一曰天

柱三公之位也在人曰三公在天曰三台主開德宣符西近
文昌二星曰上台為司命主壽次二星曰中台為司中主宗
室東二星曰下台為司祿主兵所以昭德塞違也又曰三台
為天階太一躡以上下所以和陰陽而理萬物也又曰上台
上星主兗豫下星主荆揚中台上星主梁雍下星主冀下台
上星主青下星主徐三階平則陰陽和風雨時穀豐世泰不
平則反是三台不具天下失計色明齊等君臣和而政令行
微細反是一曰天柱不見王者惡之司命星亡春不得耕司
中不具夏不得耨司祿不具秋不得穫一曰三台色青天下
疾赤為兵黃潤為德白為喪黑為憂

觀象玩占三台六星一曰三衛一曰三奇一曰天柱一曰天階一曰泰階三公之位也諸侯農人之象也上台起文昌中台對軒轅下台抵太微上台曰太尉司命為孟中台曰司徒司中為仲下台曰司空司祿為季

按三台六星其最南一星亦在黃道北二十四度半月五星皆不及犯

彗孛客星見三台

宋史天文志客星入之貴臣賜爵邑出而色蒼臣奪爵守之大臣黜或貴臣多病彗星犯三公黜

觀象玩占彗孛出三台有陰謀宮中火起彗孛出上台兵起

三公大臣有憂出中台，奸臣有謀，兵大起，貴人出，出下台。近臣以憂死。客星入三台，色黃白，貴人有賜爵者。客星合三台，天子左右有不正之臣，守三台有兵喪。曰水災。客星入司命，甘氏曰：臣有坐罪者，色黃白，自解。黑死，石氏曰：客星入司命，色蒼，民多死，喪黃白，婦女多傷，黑，嬰兒多死。客星出司命，天子憂，客星入司祿，大臣爭榮，色黃白，潤澤，近臣賜爵，色青有抵罪而走者，黑則死。

天文會通：彗孛干犯三台，朝廷有兵變，大臣惡之。客星出三台，若守之，大臣黜，或貴人多病死。

流星出入三台

宋史天文志流星入天下兵將憂抵中台將相憂

觀象玩占流星入上台司命大臣有坐罪者出之近臣有黜者流星入中台司中姦臣來出之姦臣出流星入下台司祿大臣有賜爵封者出之臣有罪出走色黑者死期二年黃帝占曰流星出三台大將出師

天文會通流星出三台大臣受命出疆抵三台三公失勢
雲氣出入三台

宋史天文志雲氣入蒼白民多傷黃白潤澤民安君喜黃將相喜赤為憂青黑憂在三公蒼白三公黜

觀象玩占赤氣入三台多敗傷臣有謀黑氣入三公憂將相

死蒼白氣入民多死喪出則禍除

天文會通黑雲氣出三台大臣有陰謀黃雲氣如蓋覆三台
主天子有喜青主饑赤主火災

長垣

宋史天文志長垣四星在少微星南主界域及北方

觀象玩占長垣四星在少微南西北列主邊界城邑其星有
變色動搖則邊城不安

月五星犯長垣

宋史天文志熒惑入之北人入中國太白入九鄉謀邊將

叛

觀象玩占歲星入長垣強臣陵主一曰叛臣伏誅 熒惑犯
守長垣兵入出之兵出 太白入長垣邊將叛犯之兵犯邊
守之邊兵大起 辰星犯長垣兵入邊城憂

天文會通土星犯長垣邊城有土功 木土水星犯守長垣
疆界擾亂

按長垣四星第一星在黃道北四度半月與火金水三星
及犯之土木二星皆不及犯第二星在黃道北六度弱月
與金星及犯之土木火水四星皆不及犯第三星在黃道
北三度弱月與土火金水四星及犯之惟木星不及犯第
四星在黃道南二度弱月五星皆及犯之

彗孛客星見長垣

宋史天文志彗孛犯之北地不安

觀象玩占彗孛出長垣大臣反兵起一日邊兵起客星入長垣兵犯邊守之邊兵起邊城憂

流星出入長垣

宋史天文志流星入北方兵起將入中國

雲氣出入長垣

觀象玩占蒼白氣入長垣兵起赤氣入兵入亦為火

天文會通黑雲氣入長垣其國有陰謀黃雲氣如傘蓋長垣不掩其星中外交驩白雲氣入_之兵起青赤氣如人形抱長垣

邊地糴賈百姓流亡

少微

史記天官書廷藩西有隋星五曰少微士大夫正義少微四星在太微南北列第一星處士也第二星議士也第三星博士也第四星大夫也占以明大黃潤則賢士舉不明反是

宋史天文志少微四星在太微西士大夫之位也一名處士或曰博士官一曰主衛掖門

觀象玩占少微四星主賓賢才弼教化黃帝占曰少微主藝能道術之士星明而行列正則王者任賢良舉隱逸天下治安微小不明則反是

按少微四星其最南一星亦在黃道北十度強月五星皆不及犯

彗孛客星見少微

宋史天文志客星孛星犯之王者憂奸臣衆 彗星犯功臣有罪一曰法令臣誅

觀象玩占彗孛犯入少微白衣聚道術不用智士逃 客星守少微處士憂入少微奸臣聚出少微道術工巧之士用一曰有方伎之士以術進媚於天子者

天文會通彗星掃少微大臣專恣 星孛少微其野有大臣以兵叛 客星干犯少微賢士心離

流星出入少微

宋史天文志流星出賢良進道術用

觀象玩占流星出少微賢士出視其所之入抵少微賢良集
道術用能人多來者

天文會通流星出少微掩星不見輔臣有憂處士受辱

雲氣出入少微

宋史天文志雲氣入色蒼白賢士憂大臣黜

觀象玩占蒼白氣入少微賢士憂一曰大臣黜赤氣入少微
宰臣謀叛

天文會通黃雲氣如盖回旋少微上而不掩星賢人進諂佞

死青白雲氣相間少微有急兵

靈臺

宋史天文志靈臺三星在明堂西神之精明曰靈四方而高曰臺主觀雲物察符瑞候災變也武家曰與司怪占同
觀象玩占靈臺三星不見則司天之官失其守陰陽不和

月五星犯靈臺

觀象玩占五星犯靈臺水旱不時一曰厯官有憂

天文會通月暈靈臺臣下有匿謀 木星守靈臺國饑 金

星犯靈臺國有兵喪 土星犯靈臺其野有土功 水星犯

靈臺其國大水荒 六曜干犯靈臺道術廢九流災

按靈臺三星第一星在黃道北一度強第二星在黃道南十三分第三星在黃道南二度半月五星皆及犯之

流星出入靈臺

天文會通流星抵觸靈臺天官失職

雲氣出入靈臺

觀象玩占青黑氣入靈臺有大風雨黃雲入太史喜赤白氣太史有憂

虎賁

宋史天文志虎賁一星在下台星南一曰在太微西蕃北下台南靜室花頭之騎官也明則臣順與車騎星同占

觀象玩占虎賁一星在太微西蕃之外上相之西下台之南
主宿衛侍從變色或搖動則兵車大動

按虎賁一星在黃道北十六度半月五星皆不及犯

彗孛客星見虎賁

觀象玩占彗孛出虎賁守衛之士為亂

天文會通彗星掃虎賁天子兵盡行彗抵虎賁內亂 星孛

虎賁兵變 客星抵虎賁車騎滿野

流星出入虎賁

天文會通流星犯虎賁天子遣大將出

雲氣出入虎賁

天文會通黑雲氣入虎賁內有兵變黃雲氣入之大將受賜
青赤氣入之三軍之糧蒼白氣入之侍衛有叛者

明堂

宋文天文志明堂三星在太微西南角外天子布政之宮明
吉暗凶

觀象玩占明堂三星主宗祀先王朝覲萬國其星明則王道
行暗小則反是

月五星犯明堂

宋史天文志五星犯明堂主不安其宮

天文會通月暈明堂三日內有急雨 火逆犯明堂王庭有

火災 木星守明堂王者德澤下施天下和平 土星逆犯
明堂興役以營宮室下民怨 水星逆守明堂有急令一曰
興大獄

按明堂三星第一星在黃道南半度弱月五星皆及犯之
第二星在黃道南三度月與土火金水四星皆及犯之惟
木星不及犯第三星在黃道南五度半月與火金二星及
犯之土木水三星皆不及犯

彗孛客星見明堂

天文會通彗星掃明堂強臣擅命 星孛明堂有苛令 客
星犯明堂色白如粉絮王庭有刺客一曰外臣有匿謀

流星出入明堂

天文會通·流星出明堂中，人君遣使布政四方。
雲氣出入明堂

天文會通·黃氣覆明堂，法政宣布，下民悅豫。

欽定天文正義卷二十一

天市垣占

天市垣占

史記正義天市垣二十二星在房心東北主國市聚交易之所。一曰天旗明則市吏急商人無利。忽然不明反是市中星衆則歲實稀則歲虛。

晉書天文志天市垣二十二星主權衡主聚衆。一曰天旗庭主斬戮之事也。市中星衆潤澤則歲實。

宋史天文志天市垣二十二星在房心尾箕斗內官之內。東藩十一星南一曰宋二曰南海三曰燕四曰東海五曰徐六曰吳越七曰齊八曰中山九曰九河十曰趙十一曰魏西藩十一星南一曰韓二曰楚三曰梁四曰巴五曰蜀六曰秦

七曰周八曰鄭九曰晉十曰河間十一曰河中象天王在上諸侯朝王王出臯門大朝會西方諸侯在應門左東方諸侯在應門右其率諸侯幸都市也六然天文錄曰天子之市天下所會也星明大則市吏急商人無利小則反是忽然不明糴貴中多小星則民富

觀象玩占天市垣二十二星一曰天府一曰長城天子之市也又曰天市者都市也天下之所會也石氏曰天市垣二十二星主四方邊國其星芒角搖動光色異常即為其國有不由臣有叛謀微小失色則其國弱黃帝占曰天市垣星欲其光明潤澤則吉其星不明若市中星少皆為歲虛五穀傷糴貴

人飢

太白犯天市垣

宋史天文志太白入天市兵起糴貴

觀象玩占太白入天市海中占曰國有兵謀將相有死者文
曜鈞曰市驚斧鉞用兵起一曰大臣有謀太白入天市而守
之相坐之一曰兵起貴人憂

天文會通金星守天市將軍憂

按天市垣最南東藩一星曰宋在黃道北七度強惟金星
及犯之月與木火土水四星皆不及犯其餘垣內諸星距
黃道北尤遠月五星皆不及犯也

彗孛客星見天市垣

史記正義彗星出入天市當徙市入都 客星入天市兵火
起出之有貴喪也

後漢書天文志彗星出天市為外軍 客星見天市中為貴
人喪

宋史天文志客星守天市度量不平星色白市亂出天市有
喪 彗星守天市穀貴豪傑起徙易市都掃帝出天市除舊
布新

觀象玩占彗犯天市地震又以所犯者言之守天市五穀大
貴 彗孛出天市內外豪傑俱起執令者死 客星入天市

兵起大臣誅色黑市使死色青白市使憂以入日占國郝萌
曰犯外城羅貴居市大貴遊市旁小貴赤星入市人多棄市
者黃白星入天市嗇夫不遷即有賜黑星入市嗇夫死白星
入市市中亂容星犯天市所犯者坐之

天文會通彗星出天市尾掃東西垣諸侯有兵喪各以星命
其國若彗光芒掩星不見其國有革政各以所掩星命之

星亭天市垣商賈不通貨湧貴

流星出入天市垣

宋史天文志流星入天市色蒼白物貴赤火災民疫一曰出
天市為外兵

觀象玩占。流星入天市。石氏曰。市吏有憂。巫咸曰。度量不平。天文會通。流星入天市。色蒼黃。外國大商入都市。一曰外國貴貨入都市。流星出天市垣中。天子將易都市。

雲氣出入天市垣

宋史天文志。雲氣入天市。色蒼白。民多疾。蒼黑。物貴。出物賤。黃白物賤。黑為嗇夫死。

觀象玩占。蒼白氣入天市。市中疾疫。市吏遇賊。出則禍除。蒼黑氣入天市中。萬物賤。一曰入之。萬物貴。出則萬物賤。赤雲氣入天市。兵器貴。一曰斧鉞用。如波揚。市有大憂。赤氣出天市。兵出弓弩大貴。黃白氣入天市。有奇物自外入。出之。市中

奇物出赤氣入天市市有火憂

帝座

宋史天文志帝座一星在天市中天皇大帝外座也光而潤澤主吉威令行微小大人憂

觀象玩占帝座一星在天市垣中候星之西天庭也巫咸曰神農所居石氏曰天位也天之貴神張衡曰帝座者帝王之位也星明潤則天子威德行微小則天子暗弱

按帝座一星在黃道北三十七度強月五星皆不及犯

彗孛客星見帝座

宋史天文志客星入色赤有兵守之大臣為亂

彗孛犯人民亂宮廟徙

觀象玩占客星犯帝座人民亂一曰臣侵君赤星守之朝廷有兵

天文會通彗星如粉絮犯帝星兵喪並起彗本天市外末掃天市中抵帝星宮中及天子庭有匿謀彗孛凌掩帝座不見有大喪客星色蒼白犯帝星有喪若抵帝星旁臣有叛者若色赤而銳如劍天子以兵驚一曰以火驚客星色黃出帝座旁天子出德令以安天下

流星出入帝座

宋史天文志流星犯諸侯兵起臣謀主貴人更令

觀象玩占。流星出帝座。天子使出。以色占其事。以星所之占國。

天文會通。流星色蒼白。抵帝座星。有暴兵。

雲氣出入帝座

天文會通。蒼白氣抵帝星。有喪。抵帝座旁。臣有叛者。青赤氣抵之。近臣有謀。氣明者謀成。氣不明者謀不成。黃白氣環繞帝星旁。天子有子孫喜。

候星

宋史天文志。候一星在帝座東北。主伺陰陽也。明大輔臣強。

細微國安

觀象玩占候一星在天市中土官也主候陰陽伺遠國夷狄
又主時變貨財

按候星一星在黃道北三十七度弱月五星皆不及犯

彗孛客星見候星

宋史天文志客彗守之輔臣黜 孛犯臣謀叛

觀象玩占彗孛犯候星兵起 客星入天候士卒疲人有急
行出天候天下人起相攻守之外客欲為主

流星出入候星

觀象玩占流星抵候星夷狄內侵

宦者

宋史天文志，宦者四星在帝座西南，星微吉，失常宦者有憂，按宦者四星，其最南一星亦在黃道北三十三度半月五星皆不及犯。

彗孛客星見宦者

觀象玩占，彗孛出宦者，宦者謀作亂，犯之宦者誅。客星犯宦者，宦者滅亡。

天文會通，彗星守宦者，侍臣有憂，干犯宦者，宦者官竊權。

星孛宦者，中官失勢，一曰內侍謀逆不成，坐法死，又曰內侍秉政，客星干犯宦者，中使有憂，客星守宦者，中官有暴貴者。

流星出入宦者

觀象玩占。流星入宦者。宦者憂。

天文會通。流星干犯宦者。近侍有憂。

雲氣出入宦者

觀象玩占。黃氣入宦者。宦者受賜。赤氣入宦者。誅。黑氣入宦者。死。

天文會通。青白氣入宦者。內侍犯法。紫氣盤覆宦者。上。內官以兵謀叛。

斗星

宋史天文志。五星在宦者南。主平量。乾象新書。在帝座西。

觀象玩占斗五星在天市中星明則吉不明則五穀不成

按斗星五星其最南一星亦在黃道北二十九度每月五星皆不及犯

彗字客星見斗星

宋史天文志客彗犯為饑

觀象玩占彗字出斗斛斗斛不用人饑流亾

天文會通彗字于犯斗星其下大荒星字於天市觸斗星

有水旱之災客星色蒼白犯斗星市吏急商賈怨客星色

黃犯斗星斗斛均平五穀熟穰賤

流星出入斗星

觀象玩占。流星抵斗。斛權量不平。市吏有憂。

天文會通。流星抵觸斗星。歲熟色黃。災淺色青。白赤黑尤甚。雲氣出入斗星。

天文會通。黃雲氣入斗星。年穀豐。市安寧。青白氣入斗星。暴兵起都市。年凶。黑氣入斗星。大水入市。赤氣入斗星。有火災。亦主旱。

斛星

宋史天文志。斛四星在斗南。主度量。分銖算數。其星不明凶。凶則年饑。一曰在市樓北。名天斛。

觀象玩占。斛四星在市樓北。斗星南。亦曰天斛。主度量。占與

斗同。

按斛星四星。其最南一星亦在黃道北二十九度半。月五星皆不及犯。

列肆

宋史天文志列肆二星在斛西北主貨金玉珠璣。觀象玩占列肆二星主市貨。星移徙則市肆不安。

天文會通列肆二星明則吉。暗則商賈不通。

按列肆二星其最南一星亦在黃道北二十二度強。月五星皆不及犯。

彗孛客星見列肆

天文會通彗星出列肆寶玉耗國財匱乏 星孛列肆財用
不足市司災 客星色蒼白守列肆則珍寶入兼并家色赤
黃有巨商入都市色黑則歉色純白為兵喪

流星出入列肆

天文會通流星抵列肆色黃則海外巨商入都市一曰貴貨
入市並資國用流星直入抵觸列肆色赤都市有火災

雲氣出入列肆

天文會通黃氣入列肆寶玉珠璣充府庫赤氣入列肆寶玉
為反爐黑氣入之民貧困

屠肆

宋史天文志屠肆二星在帛度東北主屠宰烹殺

鬻象玩占屠肆二星微暗則魚肉貴

天文會通屠肆二星明大則肆多宰殺明大光芒四出乍東乍西屠宰有刺客以光芒所指命其國

於屠肆二星其最南一星亦在黃道北四十五度強月五星皆不犯

彗孛客星見屠肆

天文會通彗本在屠肆尾掃帝座庖宰進毒不掩星則謀不成
星孛屠肆天下多屠宰 客守屠肆庖人受爵賞

流星出入屠肆

天文會通流星色蒼白自天市入抵屠肆則外國進珍錯

雲氣出入屠肆

天文會通蒼白氣入屠肆天下多傷生命

車肆

宋史天文志車肆二星在天市門中主百貨星不明則車蓋
盡行明則吉

觀象玩占車肆二星在天市南門內主車駕又為衆賈之區
天文會通車肆星明而黃潤商賈集都市星暗而搖動商賈
不通百貨滂賈

按車肆二星其最南一星亦在黃道北十一度半月五星

皆不及犯

彗孛客星見車肆

宋史天文志客星彗星守之天下兵車盡發

觀象玩占彗孛客星犯守車肆天下兵車大動

天文會通彗孛干犯車肆道路不通兵車滿野

流星出入車肆

天文會通流星干犯車肆道路不通兵車滿野

雲氣出入車肆

天文會通黑雲氣入車肆闕市有寇又曰百貨不入市黃氣入之市吏公忠百貨平易商賈行赤黑雲氣入之百貨湯貴

宗正

宋史天文志宗正二星在帝座東南宗大夫也武密曰主司宗得失之官乾象新書在宗人西

觀象玩占宗正二星帝宗也主宗人星明大則帝宗強失色則宗正有事

天文會通宗正星明潤天子親睦九族暗及變色宗族不和宗正有變

按宗正二星其最南一星亦在黃道北二十六度強月五星皆不及犯

彗孛客星見宗正

宋史天文志彗星守之若失色宗正有事客星守之更號令也犯之主不親宗廟星守其分宗正黜

觀象玩占彗守出宗正宗人謀亂犯宗正宗正有事客星出宗正若守之不去宗族羣臣多死

天文會通彗出宗正旁司宗族者惡之星守宗正旁宗正以事逐一曰主司宗正者亡客星守宗正親屬有變一曰貴人死

流星出入宗正

觀象玩占流星入宗正左右帝宗有黜者

天文會通流星出宗正親族出使

雲氣出入宗正

天文會通黃氣入宗正。宗正受賞黑雲氣入之親族離散白雲環繞宗正。近族受兵權以兵事坐廢。

宗人

宋史天文志宗人四星在宗正東。主錄親疏享祀宗族有序。則星如綺文而明。動則天子親屬有變。

觀象玩占宗人四星。小宗之象。星明大方正。則族人有序。人主康寧。動搖則宗族不和。

按宗人四星。其最南一星亦在黃道北二十五度弱。月五星皆不及犯。

彗孛客星見宗人

宋史天文志客星守之貴人死

觀象玩占彗孛出宗人占同宗正 客星出宗人宗人不和

天文會通彗星出天市尾掃宗人宗室有匿謀彗在宗人星

旁尾掃近帝星宗族有陰謀 客星乘守宗人不下則宗族

有驚憂

流星出入宗人

觀象玩占流星入宗人親戚離

雲氣出入宗人

天文會通黃雲氣入宗人親屬有錫賚蒼白氣掩宗人宗族

散亡。黑氣尤甚。青白氣入宗人。天子以兵征叛族。

宗星

宋史天文志。宗星二星。在候星東。宗室之象。乾象新書。在宗人北。

觀象玩占。宗星二星。在宗人東北。候星之東。主先人祠享。主別親疏宗室之象也。其星明而相近。則帝宗相親。離拆則宗人攜貳。若有謀者。又曰宗星明。則族人有序。暗則宗室衰弱。按宗星二星。其最南一星。亦在黃道北四十一度。強月五星。皆不及犯。

彗孛客星見宗室星

宋史天文志。客星守之。宗支不和。暗則宗支弱。

觀象玩占。彗孛客犯宗星。占同宗正。

天文會通。彗孛犯宗星。宗人黜。彗星出宗星。光芒掃帝星。則宗室強盛。有陰謀。星孛宗星。則宗人被黜。一曰貴臣薨。客星抵宗星。親疏尊卑相踰。不循禮法。

流星出入宗星

天文會通。流星起宗星。流自天市門出。色青白者。則強宗在外。以兵叛。

雲氣出入宗星

天文會通。蒼白雲氣掩宗星。宗室披甲冑。黃雲氣宗星^起下覆。

不散亦不掩星皇族受賜

帛度

宋史天文志帛度二星在宗星東北主度量買賣平貨易者
乾象新書在屠肆南星明大尺量平商人不欺

按帛度二星其最南一星亦在黃道北四十四度強月五
星皆不及犯

彗孛客星見帛度

宋史天文志客星彗皇守之絲綿大貴

天文會通彗星出帛度絲帛湧貴尺度不平 星孛帛度百
貨貴市吏不公欺商賈 客星蒼白色守帛度外國巨商入

境若色黃潤則商通行百貨平易客星色青白出芒角犯帛
度寇盜入市

流星出入帛度

天文會通流星蒼白色抵帛度市都交易多欺弊流星色黃
抵帛度有珍貨入市

雲氣出入帛度

天文會通黑氣入帛度商賈不行黃氣入之巨商入都市

市樓

宋史天文志市樓六星在天市中臨箕星之上市府也主市
賈律度其陽為金錢陰為珠玉變見各以其所之占之乾象

新書主闡闡度律制令在天市中。星明吉，暗則市吏不理。
巽象玩占，市樓六星太明，則賦斂重，太暗則市吏不理。星移
動，則市價殊不具，則兵作於市。

按市樓六星，其最南一星，亦在黃道北十度強。月五星皆
不及犯。

彗孛客星見市樓

宋史天文志：彗星客星守之，市門多閉。

觀象玩占：彗孛客星犯守市樓，皆為市中有兵亂。

天文會通：星孛市樓中，市吏不公，市井有怨言，財賄不入市。
客星如杯棬，乘守市樓五十日不下，則闕市兵起。客星赤

色守市樓，闌閣有火災。

流星出入市樓

天文會通：流星抵市樓，外國有巨商奇貨入境，色黃則吉，餘色俱凶。流星抵市樓，陽則金錢入市，抵其陰則珠玉入市。

雲氣出入市樓

天文會通：黑氣入市樓，闌閣兵起；蒼白氣入市樓，市井衣甲；青赤氣入市樓，百貨湧貴；市吏不公，黃雲入市樓，奇貨珠玉金帛併入都市。

七公

宋史天文志：七公七星在招搖東為天相，三公之象也。主七

政明則輔佐強大而動為兵齊則國法平戾則獄多囚連貫
索則世亂入河中耀貴民飢

觀象玩占七公七星橫列貫索之口天之輔相主疑議石氏
曰七公者三公廷尉之象主執法別善惡之官星大而齊明
則議臣忠國法平差戾則獄多冤微細不明則疑議不決人
主憂

天文會通七公七星明則吉暗則大臣失職

按七公七星其最南一星亦在黃道北四十九度月五星
皆不及犯

彗孛客星見七公

宋史天文志客星守歲饑主危

觀象玩占彗孛犯守七公巫咸曰宰相三公受誅一日忠言者受殃客星出七公將相憂議臣坐罪直言者凶守七公天下飢君不安

天文會通彗星掃七公天子失輔星孛七公大臣死客星出守七公三公有異志一日輔臣當之

流星出入七公

宋史天文志流星出其分主將黜

觀象玩占流星出七公石氏曰兵將出

天文會通流星犯七公輔臣失勢亦曰宰相有憂流星出七

公大臣出使

雲氣出入七公

天文會通黑雲入七公大臣受辱蒼白雲氣入之大臣出征
黃氣覆七公上大臣受寵

貫索

史記天官書有句園十五星屬杓曰賤人之牢其牢中星實則囚多虛則開出索隱其形如連環即貫索星也正義貫索九星在七公前一曰連索一曰連營一曰天牢主法律禁暴強故為賤人牢也牢口一星為門欲其開也九星悉見則獄事繁不見則刑務簡動搖則斧鉞用中虛則改元口開則有

赦人主憂若閉口及星入牢中有自繫死者常夜候之一星
不見有小喜二星不見有則賜祿三星不見則人主德令且
赦遠十七日近十六日

宋史天文志貫索九星石申曰一星亡則有賜爵三星亡大
赦入河中為飢中星衆則囚多

觀象玩占貫索九星在天市垣外七公之前主繩姦律暴其
口北開謂之牢戶中央大星牢監也牢中小星不欲其多星
多則囚多少則囚少牢中無星則天下獄空牢戶開則有赦
迫促不開則刑獄煩酷又曰恒以五子日夜候貫索一星不
見則有小赦二星不見則有賜祿三星不見則人主德令行

且赦

按貫索九星其最南一星亦在黃道北四十四度強月五星皆不及犯

彗孛客星見貫索

史記正義有客出貫索視其小大大有大赦小亦如之

宋史天文志彗星出其分中外豪傑起客星入有枉死者色黃諸侯獻地青為憂赤為兵白乃為吉

觀象玩占彗孛出貫索大臣有反者有大赦客星犯貫索有赦石氏曰不有大赦必有大獄客星入貫索天下多死人色黃諸侯有以土地坐法者

天文會通彗星掃貫索宰相當之 星字貫索與大獄一日
大臣下獄又曰獄事煩天下有冤獄 客星入貫索有枉死
者出貫索有赦

流星出入貫索

宋史天文志流星入女主憂或赦出則貴女死

觀象玩占流星入貫索天下有大獄

天文會通流星犯貫索使者以事坐法流星出貫索大臣有
罪以赦原

雲氣出入貫索

宋史天文志雲氣入色蒼白土地青兵起黑獄多枉死白天

子喜

觀象玩占。赤氣入貫索，兵起。出貫索，兵出。黃白氣入之，天子有喜。赤白氣入，獄多枉死者。黑氣入，大人惡之。

天文會通。蒼白氣入貫索，將以軍事坐獄。黃氣環繞貫索，不入不掩，天下刑措，民無冤枉，餘色俱凶。

天紀

晉書天文志。天紀九星，在貫索東，九卿也。主萬事之紀。理怨訟也。明則天下多詞訟，亡則政理壞。國紀亂散，絕則地震山崩。

宋史天文志。天紀九星，九卿之象。萬事綱紀，主獄訟。

觀象玩占天紀九星又為九河。曰天緯。主紀萬事。理冤訟。九星齊明。則王法無偏。天下不怨。暗小。則天下獄訟多不理。按天紀九星。其最南一星。亦在黃道北五十一度半。月五星皆不及犯。

彗孛客星見天紀

宋史天文志。客星守之。主危。民飢。客星犯諸侯。舉兵。彗孛犯之。地震。客星彗星合守。天下獄訟不理。

觀象玩占。彗孛犯天紀。地震。國相代。客星入天紀。黃帝占曰。諸侯舉兵。天下亂。

天文會通。彗星掃天紀。朝廷有弊政。彗星出天紀。有逐臣。

客星抵觸天紀百官有憂客星出天紀有奸臣在君側

流星出入天紀

觀象玩占流星入天紀臣為亂

天文會通流星抵觸天紀貴人繫獄一日廷尉出使治冤獄
雲氣出入天紀

天文會通蒼白雲氣入天紀百官失職黑雲氣入之朝廷有
憂黃氣入之款

女牀

宋史天文志女牀三星在天紀北後宮御女侍從官也主女
事明則宮人恣舒則妾代女主不動則吉不見女子多疾

觀象玩占。女牀三星。其星大小相承。則后妃安。後宮吉。微暗則後宮不安。

天文會通。女牀三星。明靜。御女賢淑。大而光明。則宮人恣。

按女牀三星。其最南一星。亦在黃道北五十九度半月五。星皆不及犯。

彗孛客星見女牀

宋史天文志。客星彗星守之。宮人謀上。客星入。女子憂。後宮恣。動女謁行。

觀象玩占。彗孛犯女牀。後宮有凶。客星犯女牀。貴人誅。入女牀。荊州占曰。天下女子有憂。

天文會通彗孛出掃女牀。嬪御有犯法者。一曰後宮有匿謀。

客星入女牀。色黃。則外國有進美女入宮。

流星出入女牀。

天文會通。流星抵觸女牀。後宮有黜者。流星入女牀。外女入宮。有暴貴者。

雲氣出入女牀。

宋史天文志。雲氣出女牀。色黃。後宮有福。白為喪。黑凶。青多女多疾。

觀象玩占。黃氣入女牀。後宮有子。喜。白氣入。有喪。黑氣入。有死者。青氣出入。有病。赤氣入。有兵。